

ի մեղաց մերոց ոչ կատարեցաւ. ոմանք
ասեն՝ թէ՛ ԼՌ. ամ թագաւորեաց:

Ալէքս՝ որդի Մանիլե՛ թագաւորեաց
ամն երկոտասան, և երկոտասան իշխանք՝
պահէին զնա: Իսկ Անդրոնիկոս ոմն իշխան՝
որպէս թէ՛ ցաւակցաբար եկեալ և պա-
հեալ զԱլէքս, դիպուկ ժամ գտեալ խեղ-
դեաց զԱլէքս և զմայրն նորա, և ընկէց ՚ի
ծով, և ինքն թագաւորեաց, և էառ զկի-
նրն Ալէքսի մատաղ, և ինքն չարածեր
ամօք: Յաւուրս սորա երեւցաւ ՚ի Աոս-
տանդնուպօլիս արեղայ մի Հոռոմ, և զսա-
տանայ իւրն Աստուած պաշտէր, և մի
շուն շրջեցուցանէր զհետ իւր, և նմա
մատուցանէր զաղօթս իւր. և բազումք
խոտորեցան յաղանդն նորա, որպէս մայր
թագաւորին՝ զմասն Աենաց Փայտին եդ ՚ի
ներքոյ կոշկաց թագաւորին. զոր իմացեալ
թագաւորն՝ ընկեց զմայր իւր ՚ի պատուոյն,
և զարեղայն այրեաց, և ԺՌ. այր և կին
ի ծովն խեղդեաց: